



Zbog ratnog zločina na području Čapljine

# Uhapšen Nikola Zovko, direktor Parka prirode Hutovo blato

Pripadnici SIPA-e po nalogu Tužilaštva BiH uhapsili i Petra Krndelja, Krešu Raiča i Ivicu Čuturu

Po nalogu Tužilaštva BiH jučer su pripadnici SIPA-e uhapsili direktora Parka prirode Hutovo blato Nikolu Zovku, čelnika Službe za civilnu zaštitu i vatrogastvo Općine Čapljina Petra Krndelja te Krešu Raiča i Ivicu Čuturu, koji su osumnjičeni da su počinili ratni zločin protiv civilnog stanovništva na području Čapljine.

Kako je navedeno iz Tužilaštva BiH, Zovko, koji je tokom rata bio načelnik Policijske stanice Čapljina, Petar Krndelj, komandir PS Čapljina, i Krešo Raič, komandant voda Vojne policije, sumnjiče se da su zajedno s drugim pripadnicima Civilne policije PS Čapljina i Vojne policije u akciji na Čeljevskoj adi, kojom je rukovodio Krndelj, zarobili tri nenaoružana civila bošnjačke nacionalnosti, a potom ih na mjestu zarobljavanja ubili.

Riječ je o braći Veleđar, Nermi i Edinu te njihovom rođaku Alemu, što nam je jučer kazao predsjednik Jedinjene organizacije boraca Čapljina Natko Bitanga.

- Njihovo hapšenje za sve čapljinske Bošnjake, koji su pretrpjeli strašne torture logora i koji su svjedočili njihovim zlodjelima, predstavlja veliko olakšanje, pogotovo za mene, jer je i moja porodica zajedno s porodicama mog brata Satka, Ese Boškaila, Bajre Pizo-

vića i Nazifa Bašića bila zatvorena punih 11 mjeseci.

Među njima su u krajnje nehumanim uslovima bile tri bebe, žene i starica od 80 godina i pred njihovim očima su tukli i maltretirali zatvorenike - rekao nam je Bitanga.

On je naglasio da je policija Čapljine, na čijem je čelu bio Zovko, dok mu je, kako je kazao, Krndelj bio desna ru-



**Zovko: Bio načelnik Policijske stanice**

ka, počinila najveće zločine nad civilnim stanovništvom Čapljine te da su provodili etničko čišćenje.

- Tu su i ubistva Envera Kudre, Ahmeta Tucakovića, Avde Kudre, ali i legendarnog komandanta iz Počitelja, Sretana Kapetanovića Kape, koji je zarobljen i maltretiran u PS Čapljina, a čiji su posmrtni ostaci nađeni u Splitu i koji je nakon 20 godina ukopan - iznio nam je Bitanga.

**M. Sm.**

## Logor Gabela

Kako je saopćeno iz Tužilaštva BiH, optužnica Čuturu tereti i da je tokom jula 1993. godine na području općine Čapljina, zajedno s njemu poznatim osobama, protivpravno lišio slobode civile bošnjačke nacionalnosti, koje su odvezli u logor Gabela.



**Bitanga: Veliko olakšanje**



**Krndelj: Na čelu CZ**